

Visoka škola „EMPIRICA“ radila u skladu sa zakonom

16. 09. 2013. u 14:00 Radio Brčko



Kontrolom koju je izvršio Odjel za obrazovanje Vlade Brčko distrikta BiH, utvrđeno je da je Visoke škole računarstva i poslovnih komunikacija eMPIRICA u akademskoj 2012/2013. godini ispunjavala zakonom propisane uslove za rad i obavljanje djelatnosti, rekao je na današnjoj konferenciji za novinare, Muhdin Mujačić, direktor ove visokoškolske ustanove.

Prema njegovim riječima, to je osnovna informacija sadržaja obavještenja o izvršenom upravnom nadzoru Odjela za obrazovanje Vlade Brčko distrikta BiH, dostavljenom 12. septembra ovoj instituciji.

„Komisija je nadzor izvršila sredinom jula na apsolutno stručan, korektan i efikasan način. Članovi komisije su proveli par dana kod nas i mi smo im ustupili svu traženu dokumentaciju, pa tako i uvid u dosjee studenata, jer smo po zakonu dužni da Odjelu za obrazovanje dostavimo na uvid sve tražene dokumente.“, istakao je Mujačić.

Mujačić je naglasio da smatra da je saradnja visokoškolskih institucija sa nadležnim ustanovama za visoko obrazovanje i širom društveno-političkom zajednicom u Brčko distriktu od iznimne važnosti.

„Svi univerziteti i visoke škole koje su se osnovale u prethodne dvije godine su na nekom početku i vrlo je bitno da se ima međusobna saradnja sa nadležnim organima vlasti, kako bi se prije svega jednostavnije poštovao zakon i kako bi se ova naša djelatnost obavljala na pravi način.“, dodao je Mujačić.

Još je naglasio, da eMPIRICA pozdravlja i daje podršku svim ustanovama, fakultetima, institucijama kojima je prvenstveni cilj kvalitet visokog obrazovanja. A također, podržava i sve one koji će omogućiti da Brčko distrikt ima kvalitetno visoko obrazovanje, što će obezbijediti i ravnopravnu tržišnu utakmicu kada je u pitanju sam rad univerziteta.

Mujačić je još istakao da je ovoj visokoškolskoj ustanovi osnovni cilj da studenti steknu kvalitetno obrazovanje, ne samo diplomu, te je svoju opredjeljenost standardima kvaliteta visokog obrazovanja iskalaza i dobijanjem akreditacije Slovenačke nacionalne agencije za osiguranje kvaliteta u visokom obrazovanju NAKVIS, što studentima eMPRIRICE omogućuje sticanje dvojne diplome-bosanskohercegovačke i slovenačke.

Sanita Jerković Ibrahimović